

PATRICK & STEFAN COMBINACION YEN DI RITMO

Diasabra mi a presencia lanzamiento di e video, DVD, "The Rythm" di Patrick Grayham y e musico arubano Stefan Bartels Daal, den Crystal Theatre.

Tabata un atardi hopi placentero, unda ademas di e representantenan di medionan di comunicacion, por a mira varios artista y personahenan di mundo di baile y modelahe, ademas personahenan di turismo.

Mi mester duna un pabien grandi na Patrick y Stefan pa e presentacion aki. Ta manera mi a bisa e cantante Patrick Grayham den chansa: "Mi a keda encanta cu e video aki cu ta un promocion inmenso pa nos isla, y den cual por mira paisahenan etc. cu a atrae. Esaki mas cu e cancion, pasobra e cancion ta un hit caba".

Prome cu a presenta e DVD, Patrick a haya su mes obliga di canta su "Fire" cu tabata e exito grandi di dje di riba su album di debut. E cantante aki a masha popular riba diferente isla di Caribe, na Hulanda den ciudadnan grandi y a cuminsa conquista paisnan europeo cu su musica y cancionnan. Awor e tin como compaño musical Stefan Bartels Daal.

Locual mi a aprecia ta cu Patrick Grayham no a laga popularidad y fama subi su cabez. El a keda cu pia riba tera, tratando su hendenan cu tur amabilidad y tin un carisma enorme.

El a relata den su introduccion tambe di e colaboracion cu Stefan. Segun Patrick, despues di a ricibi varios e-mail di Stefan, el a dicidi di manda pidi un grabacion di demostracion. Segun Patrick ta cantidad di hende ta manda pidi pa traha cune y den e caso aki, el a kere cu Stefan lo cay afo manera hopi, sin embargo Stefan a mande un "demo" cu el a keda encanta cune y mes ora a invita Stefan te cu nan a bira partner den musica.

E mester a traha un cancion pa un cantante popular, y ora el a scucha loke Stefan tabata tin, el a bisa cu hendenan di compania di grabacion "esaki ta keda pa nos mes".

Mi relacion cu Stefan: Mi a conoce composicionnan y areglonan di Stefan tempo cu ainda e tabata teenager y a compone pa e banda Songgo y a participa den concurso di calypso y roadmarch. E cancion di dje a clasifica, pero ningun hende a menciona e compositor - areglista y despues di esey den mundo musical ningun hende a worry cu e compositor hoben aki. Mi a bisa nan pa tene e hoben aki na bista pasobra e ta un talento cu lo bira grandi.



Mi a cuminsa sigui Stefan y cada vez mas tabata sintimi bon ora mi mira cu su cancionnan ta clasifica den festivalnan y cu den mundo musical, ainda e no tabata acepta. Den concursunan infantil y hubenil, su cancionnan ta cancionnan ganador di titulo y di premiacionnan. Poco poco su nomber a wordo crea te cu mi a cuminsa nota con e ta wordo acerca awor si.

Un musico cu tambe a mira e talento den e hoben aki y a mira cu e hoben aki lo crece bira grandi, ta Claudius Philips. Varios aña caba den temporada di carnaval por a nota Stefan tocando keyboard/piano pa OREO. No ta kende cu ta por yega na toca keyboard pa Mighty Talent.

Stefan a persevera y cu

yudanza y sosten grandi di su mayornan, te cu el a tuma e paso grandi. El a bay Hulanda y awe ta musico productor y estudiante na Universidad di arte na Rotterdam. Den tempo masha corto el a crea un nomber na Universidad y den mundo musical na Hulanda y awe nos ta mira con e ta trahando ademas hunto cu otro talento grandi caribense.

Mañan..... mañan ta henter Aruba lo mester ta orguyoso di e talento aki cu ta riba caminda pa ta un top musico di nos isla.

Patrick Grayham? Ta manera mi a relata na Claudius Philips. Mi a menciona un mescla di mi mes y di Patrick mi a bisa cu e ta un mescla yiu di Corsou, yiu di St.Maarten, naci na Surinam, biba na Hulanda y na mes momento Latino cu paspoort hulandes di raza latino-caribense como un west-indian. (West Indian ta otro album di e cantante aki)

Pa esnan cu no sa, Patrick Grayham ta "Embahador di Cultura" nombra pa gobierno di St. Maarten. El a traha ademas cu ganador di Grammy, Phil Tan y varios artista internacional di renombre y participa na festivalnan grandi y tambe na e Festival di Regata di St. Maarten. No mucho tempo pasa e tabata tin tambe e cancion "Bolbe" entre e mihor 3 cancionnan top na Aruba y el a subi cune tambe den Top 20 Latino di FunX Latin chart.

Mi ta kere cu mi tin cu uni cu Claudius Philips, ora el a bisa cu orguyo di Stefan Bartels Daal: "That's my boy!" you remember that?

Ta esey tambe mi a bisa 31 aña pasa di Claudius y e ta aprecia esey te awe.

Juby Naar